

ORATIO

EX

HARVEII INSTITUTO

IN AEDIBUS

COLLEGII REGALIS MEDICORUM

HABITA

PRIDIE CALEND. JULII, A.D. MDCCXLIX.

A

JOHANNE CARR BADELEY, M.D., CANTAB.

COLL. REG. MED. LONDINENSIS SOCIO.



LONDON:
JOHN CHURCHILL, PRINCES STREET, SOHO.
MDCCXLIX.

LONDON :
G. J. PALMER, SAVOY STREET, STRAND.

P353E3

COLLEGII REGALIS MEDICORUM

LONDINENSIS

P R A E S I D I S O C I I S Q U E

Hanc Orationem

O B S E R V A N T I A D E B I T A

D.D.

JOHANNES CARR BADELEY.



EXTRACT FROM THE WILL OF DR. WILLIAM
HARVEY, A.D. 1656.

“ To maintain friendship, there shall be once in every year a
“ *general feast* for all the Fellows of the College of Physicians ;
“ and on the day of such Feast shall be *an Oration in Latin*, by
“ some Member, to be appointed by the President, two eldest
“ Censors, and two eldest Elects, so as not to be appointed two
“ years together, in commemoration of the Benefactors by name,
“ and what in particular they have done for the benefit of the
“ College ; with an exhortation to others to imitate, and an
“ exhortation to the Members to study and search out the
“ Secrets of Nature by way of experiment, and for the honour
“ of the Profession, to continue mutually in love.”



ORATIO.

DIGNISSIME PRÆSES ;
SOCI DILECTI ET ORNATISSIMI !
VIRI ILLUSTRES SPECTATISSIMIQUE !

BIS senis mensibus peractis, dies rursus adest,
quo nos convenire jussit Harveius, quo et Oratio-
nem Latinam, ab uno è Collegii Medicorum Sociis,
præcepit habendam. Tot vero talesque vos hue
hodie convenisse, mihi jam senescenti—mihi vitam in
rure, (heu ! nimis otiosam) degenti—mihi ab urbe et
doctrinæ sedibus amoto—at tali munere functuro,
non levem certè timorem incutiat necesse est, quo
et magnoperè me quidem commotum sentio ! Non
tamen adeo mihi perterreri videor, quin adsit simul
nonnihil etiam superbiae et voluptatis ; licet enim
hodie dignitatem artis Medicæ tueri, laudesque
eorum qui in eâ promovendâ, qui et in miseris suc-
currendis plurimum profecerint, publicè celebrare !
Quid autem vel novi, vel vestris auribus digni pro-
feram, qui in re Medicâ probè versati, in doctrinâ
et in scientiâ præ me palmam tam facile fertis ?

Spero equidem ab audientium clementiâ Oratoris tenuitati subventum iri; et tanto vestrûm præsidio munitus, ad munus suscipiendum, quod mihi hodie delatum est, confidentiùs quodammodo, et majori alacritate accingor! Pro jussu igitur, et testamento Harveii, eorum qui Collegium hoc nostrum beneficio affecerint nomina commemorare — quæque singuli præstiterint referre—et dein posteros, vestigia talia prementes, ut Naturæ Arcana experimentis ipsi scrutarentur, exhortari nostrum est. Quod cum Harveius ordinavit, et epulum postea apparandum legavit;

“ Ut pueris olim dant crustula blandi
Doctores,”

imprimis ut aurem Orationi præbeatis, vos obsecro,
quo vobis officio functis,

“ Tempus erit dapibus, Sodales ! ”

Et unde potiùs proficiscatur Oratio nostra, quàm è Linacri virtutum commemoratione ? Ille enim (Collegii nostri verè Pater Fundatorque) præ turbâ cæterorum mihi laude dignissimus videtur, quippe qui nihil quod Medicinæ profuerit, prætermissum habuit. In literis Græcis et Latinis eruditissimus, eas primus apud Oxonienses edocuit—dum verò literis tam feliciter se præbuit, omnigenamque doctrinam, et philosophiam diligenter coluit, cæteris, in re medicâ etiam, adeò præstitit, ut tribus Angliæ Regibus Archiater constitutus, se illustrem, se immortalem reddiderit. Maxima verùm laus Linacro debetur, quòd singulari suâ apud Regem, Henricum

Octavum gratiâ usus est, per quam et Medicinæ dignitatem, et ejus Professores sustineret et efferret. Eo enim sæculo, et Monachi et Empirici medendi artem latè exercuerunt; et Episcoporum erat hos *ψευδο τατρούς* perscrutari. Quum autem hi Episcopi (quantâcunque pietate et theologiâ imbuti essent) non satis docti a Linacro haberentur ut de Medicorum peritiâ dijudicarent; hoc Collegium (Volseio duce et auspice), non solum Linacre fundavit, sed et Censores Medicorum instituit, qui non nisi peritis suæ artis exercendæ facultatem darent. O! utinam ille, qui de Medicis, qui de Republicâ tam bene meruit, iterum inter nos redivivus extaret, ut et nos simili beneficio cumularet! Utinam aliquis eodem ingenio ornatus exoriatur, qui non solum Medicis, verum etiam toti Civitati hujus Collegii utilitatem extenderet!

Quantum profecto saluti publicæ profuerit, si Angliæ Senatus auctoritatem plenam Collegio nostro concederet, per quam ignaros Medicinæ professores, nec gradu Academico, nec Diplomate donatos, non solum in hâc urbe, sed etiam per totam Angliam facile cohibere posset! Rationi enim vix consentaneum videtur talis Collegii auctoritatem salutiferam intra terminos tam augustos concludi! Quantò commodius, quanto Reipublicæ quæstuosius fuerit, si circulatores istos, qui plebi “grande ferunt una cum damno dedecus,” qui dolis suis improbis et funestis, nimis heu! credulos indies captant, pœnâ coercere Collegio Medicorum licuerit! Quorsum enim Collegium hoc Regale institutum est, si non

undique et in omni regni parte Artem Medicam
foveat et attollat?—si non sinceram Medicinæ Praxin,
et Medicorum dignitatem ubique sustineat?—Si non
universæ civitatis, et civium omnium valetudini
consulat?—Ad hoc se Linacre accinxit, hoc animo,
Collegium erexit—ad hunc finem igitur *nos* niti
oportet,

“ Si patriæ volumus, si nobis vivere cari! ”

Proximus huic “ calcemque terens ” emicuit JOANNES
CAIUS ! qui non modo doctrina suâ, sed et novâ dig-
nitate, et Insignibus Collegium nostrum ornavit.
Ille, Artem Medicam Anatomiae culturâ sub illustri
Vesalio foris acquisitâ, pro viribus promovere conatus
est ; et in patriam redux, cadavera dissecandi artem
publicè edocuit. Ille primus de Collegio commen-
tarios (quàm eleganter!) Latinè scripsit, variis ille
Collegii muneribus fideliter functus est, artisque
nostræ nobilitatem fortiter sustinuit. In illo, uti in
Linacro, inerat literarum humaniorum cupiditas, ex-
quisita eruditio, et illum in omni æmulatus, quod
incepit Linacre Oxoniensis, perfecit Cantabrigiensis
Caius, Collegio apud Cantabrigiam fundato, suo
nomine insignito. Ah ! quoties in sacello suo, viri
hujus eximii sepulchrum, nec non quod incisum est
epitaphium (“ *Fui Caius—Post Funera,* ”) studiosè
contemplatus sum ! Illius Collegii, in quo tot cele-
berrimi viri, (et inter hos Præses noster eruditus),
literarum studiis operam dederunt, me quondam alum-
num fuisse juvat—me morientem meminisse juvabit !
Si autem præ cæteris extat, cujus in nomine et Col-

legium a Caio fundamentum, et Collegium Medicorum gloriari fas est, in omni tempore, et hoc festo præcipue die, GULIELMI HARVEII nomen certè anteferendum agnoscimus !

“ En nova progenies Cœlo ” demitti, auctoque fulgore enitere, (astro natali Harveiano oriente) Ars nostra salutifera videtur. Altior rerum ordo cum illo natus est, qui post tot annos in Medicinâ promovendâ elapsos, fontem reclusit, è quo aureum Scientiæ flumen patriam populumque ditavit ! Nimirum ille, qui per corpus sanguinis circuitum detexit, ad morbos corporis sublevandos novam et adhuc incalcatam semitam nobis patefecit ! Ecquis enim vel febrem, vel phlogosin, nisi empiricè, hâc absque notitiâ, tractare potuit ? Ecquis de cordis motu, circulationis nescius, judicare ausus est ? Hoc omne detexit Harveyus—hoc omne experimentis probatum, et oculis aliorum fidelibus eo tempore honestè subjicit, et natis “ natorum, et qui nascentur ab illis,” in lucrum tradidit ! Hinc vero ortus est improbus et ineptus clamor ! Invidiæ veneno afflati non deerant, qui palmam Harveio debitam vel sibimet ipsis arrogare, vel aliis coronam eam triumphalem imponere, dishonestè certabant—inter quos Riolanus, et Parisanus, et Servetus, et Columbus, et Cæsarpinus, cum multis aliis enumerandi. Qualiter tamen cursum suum ordinatum Luna tenet, canesque qui vano se latratu lacesunt, cum fastu aspernatur ; “ Pergant,” respondit Harveyus, “ pergant maledicendo ; donec ipsos, si non pudet, pigeat tædeatque !” Contra enimvero veritatem quam futilis contentio !

“ Meresa profundo, pulchrior evenit ;”

et palmam, quam meruit, postremo tulit Harveyus,
et in æternum, credite, latus est.

Quantos et quales præterea honores attigerit Harveyus, nemini è nobis non compertum habeo. Quanti Rex Jacobus, et infelix ille Carolus eum fecerint, historici tradiderunt. Quod de Ovo manifestavit — quæ de Animalium generatione experimenta instituit — quod de Lienis usu — de Motu locali — de Volueribus — de Insectis vulgavit, abundè in apertum est — quæ omnia, simul cum bibliothecâ, et museo, et domo, et pecuniâ, sociis convocatis, convivioque lauto exceptis, Societati Medicorum Londinensi, tabulis signatis munificè transcripsit ! Jam verò, annum ætatis suæ propè octagesimum agens, senio morboque confectus, vitæque munere quàm optimè perfunctus — occidit — occidit Lux illa ! et obortæ testantur tenebræ quantum sit tali caruisse sole !

Ne autem diutiùs in hoc illustri Triumviratu immorer, in aliud, benè de nobis emeritum, in SYDENHAM feror. Ei sumnum in morborum diagnosi inerat acumen — in morbis amovendis egregia felicitas —

“ Nullius addietus jurare in verba magistri,”

Naturæ autem vestigia secutus, in morborum signis impensâ curâ, deliinc medendi rationem exquisivit ; neque ea quæ de febribus, de peste et de plurimis aliis contulit morbis, nimium posse laudari opinor — vel si cum amico suo Lock poeticè loqui datur ;

“ Se tandem Sydenham Febrisque Scholæque furori
 “ Opponens, morbi quaerit et artis opem :
 “ Quid febrem extinguat, varius quid postulat usus,
 “ Solari ægrotos quâ potes arte, docet ;
 “ Extorsit Lachesi cultros, pestique venenum
 “ Abstulit, et tantos non sinit esse metus.”

Sin celeberrimi hujusce meritis, ita poeticè ex-
 positis, cumulatioris aliquid laudis aliunde invectum
 lubeat afferri, audite, quæso, verba quibus ipse Boer-
 haave de illo usus est;—“ Unum eximium habeo
 “ Thomam Sydenham—Angliæ lumen—artis Phœ-
 “ bum ; cujus ego nomen sine honorificâ præfatione
 “ memorare erubescerem, quem quoties contempnor,
 “ occurrit animo vera Hippocratici viri species—de
 “ cuius erga Rempublicam meritis nunquam ita mag-
 “ nificè dicam, quin ejus id sit superatura dignitas.”
 In Febribus sanandis Cinchonæ valde innixus est, et
 Cerevisiam raro ægris deneganda in sed potius com-
 mendandam, vi sibi propriâ præcepit.—In Tractatu
 de Podagra etiam ait, “ Liquores quod spectat, ii, me
 “ judice, optimi sunt qui neque ad vini generositatem
 “ ascendunt, neque ad aquæ debilitatem deprimun-
 “ tur ; cuiusmodi est Cerevisia tenuis Londinensis ;
 “ cum extrema, ab utrâque parte, noceant.”—Dein,
 in Tractatu de Febribus hisce utitur verbis ; “ Negare
 “ vero Cerevisiam tenuem, quæ subinde in mediocri
 “ quantitate sumatur, severitas est minimè necessaria,
 “ immo etiam sæpe detrimentosa !” In tot morbis
 denique Cerevisiam tantis effert laudibus, ut seruo
 laureo, lupulis intexto, coronari mereatur !

Collegio Medicorum egregiè jam deesse, si inter

eos qui munificè ditaverint, BALDUINUM HAMEY silentio præterirem—Illum enim—

“ Non civium ardor prava jubentium,
“ Non vultus instantis tyranni,”

non incendium (quo nullum nec antea nec posthac edacius,) à nobis deflexit—Suo sumptu imprimis has ædes redemit—et postquam in cineres, simul cum urbe Londinensi, lapsæ fuerint, suis auspiciis, suâque diligentia instauratæ, aucto fulgore iterum enituere!

Per id tempus quamplurimi Arte medendi necnon literis liumanioribus insignes, exorti sunt—quales erant Joannes Friend—Ricardus Mead—Morton—Gilbert—Georgius Baker—Radcliffe—Heberden—Samuelis Garth, et eximius ille Musarum cultor, Akenside.—Diu autem in his rostris mansurus essem, si de iis singillatim loqui, et in quo quisque præstiterit, enarrare ausim—vel si, quâ variâ ratione nobis in æternùm cari vixere, et vos, Auditores, eorum memores merendo fecere, ostendere conarer—quippè ne jam patientiam vestram nimis tentaverim me pertimescere confiteor. Pace igitur eorum omnium (de quibus tacere me piget et profecto pudet,) præcipiti cursu ad recentiores descendere mihi statutum est.

Quùm de Variolis agitur—morbo ab omnibus sed ante omnes à Virginibus horrendo, ecquis non EDWARDUM JENNER, divino penè prosequitur honore? Chirurgiæ illius principis, Joannis Hunter, amicus et sodalis, faustisque sub ejus penetalibus nutritus, ad historiæ naturalis studium se sedulò accinxit, et

postea in hac peste lethali avertendâ, viri vaccini
vim præstantiorem (Ancillâ rusticâ docente et mo-
nente,) primus in lucem protulit—Quâ propter, O !
beate Senex,

“ Ne sit Ancillæ tibi amor pudori,”

cujus opem tam facili exitu fortunavit Deus—cujus
ope frequentissimam mortis januam a te obstrui et
fermè occludi, venustatem que servatam, lætis gra-
tisque animis confitemur ! At si forte objiciatur
hominem hunc felicem, cuius nomen laudabile per
totum orbem terrarum viret semperque virebit—(de
quo ipsa hæc Societas loqui suo jure possit, “ cum
“ talis sit, utinam noster esset,”) nunquam inter nos
admissum fuisse, et idcirco sub silentio premendum,
recordamini, obsecro vos, Socii ! quantam messem
non sibi soli, sed et universo humano generi eum
reportasse, et tacete !

Hisce viris tam meritò laudatis, nunc alium me
juvat adjicere, qui artem nostram auxit et ornavit, qui
et nonnullis è vobis, sicut et mihi, nec ignotus vixit,
nec illachrymabilis decessit, MATTHÆUM BAILLIE !
Ille, cum multis aliis Caledoniæ filiis, in hâc arte
nostrâ præstantissimus enituit ! Morgagni exem-
plum præ se ferens, morborum causas sedesque scal-
pello assiduè exploravit, fructumque laboris sui nobis
impertivit. Probè memini eum mihi adolescenti
dixisse, artem medicam tardè progressuram, nisi
morborum signa quæ inter vivos se objecerint cum
iis quæ post mortem spectanda fuerint, diligenterius
medici compararent ! Quisnam qui ejus opera legit,

eum omnem in hoc fuisse dubitat? Quis sedulitatem ejus in Pathologiâ colendâ rei medicæ mirè profuisse negabit? Hoc sanè est in quo medicus eruditus a circumforaneo differt! Hinc oritur quod hic noxam, ille remedium, ægrotanti affert! Medicus autem fortunæ ludibriū vivit! qui eum adhibent, in quo deficit, nesciunt—qui eum rejiciunt, peritiam, eheu! ignorant! Ut verò paulisper ad Baillie redeam.—In anatomiâ versatissimus, morborum latibula perscrutatus est, quo fit ut in iis sublevandis pollentiorem se præstiterit. Aderat etiam gravitas et auctoritas, quales verè eruditum decent; simul gratia et probitas quibus discentium animos ad se facilè allexit.—Inter ægrotantes uniuscujusque ordinis nocte dieque occupatus vixit—dein scriptis suis, et millibus anatomiæ exemplis (è quibus centum ferè suâ manu fabricatae sunt) Collegium ditavit.—Hujus igitur, etsi ex oculis frustra lugentibus eum sustulit Libitina,

“ Ingenii vivent, vivent monumenta laboris,
“ Non nisi supremo dissoluenda die.”

Nunc autem, ad duos qui se illustres reddidere, Doctores YOUNG et WARREN, eâdem ferè quâ in parentes pietate liberi commoventur, attrahor—quorum sub auspiciis me artem Medicam in Sancti Georgii Nosocomio iniisse gloriō—qui et me, dum messis adhuc esset in herbâ, vultu benigno toties aspexerint! Unum in omnigenâ scientiâ versatissimum—alterum in morbis sanandis peritissimum fuisse, quis non agnoscit? Vultu et fronte, me judice, Newtono similis, et simili quodam ingenio præditus,

in Mathesi, in Chemicâ, in Astronomiâ, in Opticis, in Mechanicis, in Linguarum cultu, neenon in toto Scientiæ orbe, simul cum Medicinâ, YOUNG præni-luit—Symbola hieroglyphica, quæ in monumentis et tabulis Ægyptiacis, et præ omnibus in Rosettæ saxo incisa sunt, e tenebris eripuit. Colores prismaticos, quibus Pus à muco distingui possit, detexit et edocuit —et de Phthisi, et de Literaturâ Medicâ observa-tiones, cum innumeris aliis magni pretii scriptis, nobis tradidit !

“ Multis ille bonis flebilis occidit,”

nec desiderio fama minor fuit ! Artem medicam auxit; et, philosophiam non à Medicinâ alienam esse, clarè manifestavit. Quidnam ornati enim habet Medicina, nisi cum philosophiâ et scientiâ conjuncta sit ? Quidnam formosi præbet arboris truncus, ramorum et foliorum omnino expers ? Navis, non nisi remigio propulsa, quàm tardè, quàm laboriosè secat iter ! cum vero “ Ventis dant carbasa Nautæ,” auctâ majestate, auctâ et velocitate, optata ad littora tendit !

De WOLLASTON, altero Caiensi alumno insigni, qui tamen medicinæ adyto relicto, in campo chemico et philosophico, “ non sinc gloriâ,” militavit—de GULIELMO BABINGTON, (qui me adhuc aedis Carthusianæ alumnum, Typho laborantem, ex Orci fauci-bus eripuit,) qui et suavitate morum, et probitate, et in re medicâ peritiâ se simul dilectum et illustrem reddidit,—de utroque horum pauca lubenter proferrem, si non animo nostro rursus occurret, quo bre-

viorem eo dulciores vobis Orationem nostram futuram. Quamobrem de permultis, qui optimè de nobis meruerunt, qui et donis et nominibus suis Collegium ditaverunt, invitus tacere cogor. Superest jam solum ex iis quos “perpetuus sopor Urget,” quem commemorare in animo est — nec vereor ne mihi succenseatis, Amici, quod HENRICUM HALFORD—

“ His saltem accumulem donis, et fungar inani
“ Munere.”

At vox mihi parùm facunda est ut dicam quæ velim, dum in dilecto hoc nomine paulo diutiùs immorer ! Ah ! quoties hùc ingredior—quoties sceptrum quod sua manus recenter gestavit video—quoties togam illam auratam, Præsidi propriam, aspicio—quandò nunc iterum hoc festo die, has ædes, tanto doctorum cætu celebratas, et tot viris illustrissimis spectatissimisque ornatas contemplor—quonam “ desiderio tam cari capit is ” nonne me commoveri sentio ?

Erat profectò ex eo medicorum numero qui in hoc collegio, in hac urbe, pluris semper habitu fuere. Ecquid erat unquam quod ad dignitatem artis medicæ tuendam, vel ad res nostras amplificandas tenderet, cui ille Præses noster amabilis non fautor fuerit et adjutor ? Ecquis unquam linguæ Latinæ elegantiarum scientior ? Ecquis utriusque senatus proceribus, vel et Regiæ Prosapiæ principibus, vixit gratior ? Ecquis ad ægros succurrentos extitit promptior ? Testantur hæc mœnia quanto labore ad ea extruenda usus est—quantas opes e Thesauro Radeliviano nobis comparavit ; et cum hoc pietatis

monumentum exegisset, quis vestrūm Orationem, quam perpolitam, in die dedicationis habuerit, non meminerit?

“Auditis? an me ludit amabilis.

“Insania?”

Audire jam videor illum eloqui—principibus viris undique circumfusum—à laudatis undique, nec im-
meritò, laudatum. Illum profectò lugent Artes
humaniores — marent Musæ — deflet Collegium--
plorant amici omnes sociique!

Dum vero, ad Harveii voluntatem me conformans,
mortuorum nomina commemoro, et quid singuli
Collegio præstiterint proferre ineptè molior, de iis
etiam qui hodiè inter nos artem nostram promovent,
scientiam colunt, et Collegio prosunt, pro meritis
fari fert animus! Quantum enimvero medicorum
agmen inter hodiernos hic laborat! Quid non de
plebe indies merentur? Immò aliis medendo, aliis
inserviendo, consumuntur medici! et quomodo per
varios aditus bono publico optimè consulere, et
sibi honestam famam quærere liceat, assiduè certant!

Hic, exempli gratiâ, Caduceo Apollineo, qui
Stethoscopi nomine gaudet, instructus,

“Pectoribus inhians, *spirantia* consultit exta!”

Ille, Cordis affectibus impensè dat operam — alii
Nervorum et Cerebri morbis curam impendunt—alii
in Mulierum perpessionibus levandis (sicut dilectus
ille Lucinæ* sacerdos, quem lætè præ oculis habeo)
eæteris præstant! In morbis Renum et Vesicæ in-

* Carolus Mansfield Clarke, Baronettus.

vestigandis alii laborant! — alii Amentiam exquirunt; et vinclis et flagellis sepositis, menti aliquod temperamentum adhibere (nec incassum) petunt.

Permultos, credite, inter recentiores interque hominios, immo inter Vos qui adestis, lubenter commorem. In hoc tantum haereo, ne vestro pudori offendam, si vos debit is honoribus cumularem! Unum tamen è vobis seligam—qui ob munus quo jam inter nos fungitur, qui et ob eruditionem suam notatu dignus mihi videtur—Etsi enim Praesidem illum, quem amore propiori dileximus, quem et avulsum oculi omnium haecce inter subsellia etiam nunc desiderant, commemoravi, “non deficit alter” qui quocunque ad materiam medicam attinet tam lucide exposuit—qui, quid sit edendum, quid bibendum, quid utrinque vitandum, nos scienter docuit—qui in chemiâ et in philosophiâ se clarum præstítit—qui chemiæ illius principis Humphredi Davy vitam fideliter scripsit—qui summatim per varios tractatus

“ Sie miscuit utile dulei,

“ Leetorem delectando, pariterque monendo,”

ut præsenti illi maturos fas sit largiri honores! Ergo, quid restat, nisi ut Horatii verbis optemus,

“ PARIS, ut salvus regnet, vivatque beatus! *

Quoniam igitur inter nos, veluti inter veteres, tales diligentiam, tales munificentiam agnoscimus, quid opus est Hortatione (ab Harveio præscriptâ,) ut eos imitemur? Quantoperè enim ars medica nuper progressa est! Quot, hactenus ignota, jam vigent

* Hor. Epist. lib. I, Epist. 2, l. 10.

remedia? Quantum Medicinæ, paucos intra annos, subvenit chemia! Sanè, quisque dies messem suam frugiferam reddit! et, licet forsan (ut Tacitus queritur,) —

“Naturâ infirmitatis humanæ tardiora sunt remedia quâm mala,” non extat malum quod vel sanare, vel plusve minusve mitigare, medicinæ non datur.

Pergîte ergo, pergite, vos, Juvenes, precor! —

“ Servetur ad imum

“ Qualis ab incepto processerit”

diligentia vestra! Eodem enîm desiderio, eodem quo veteres ingenio vos præditi estis! Nulla certè regia patet ad scientiam via; immo ad eam consequendam ingenio non mediocri et industriâ non tenui opus esse videtur. Non rubet rosa, neque suaves undique spirat odores, quam nec imbræ nec, auræ mulcent. Torpet tellus fœda sterilisque, nec nisi pingui prius fimo saturata, blandis etiam solibus tepuerit, frugum fructuumque quicquam lætiorum effundit. Nemo unquam in quâlibet arte, nisi qui prius omnia ad eam artem pertinentia, multo studio, et perito docente magistro perceperit, multâque insuper industriâ et quotidiano penè usu in eâdem sese diutiùs exercuerit, egregium quicquam et perfectius consecutus est!

Latior etiani exindè patet Medicinæ et Scientiæ campus—et uberior medicorum industriæ materies suppetit, adeò ut nemini quisquam deesse videatur, in quo se probè et felici operâ exerceat—unde quæ ad victum necessaria commodè sibi comparet—aliisque interea (in suo quisque loco,) se utilem præbeat.

Verùm dum omnes ita conjunctis et vicissim communicatis laboribus universæ civitatis utilitati inserviunt—si præ cæteris egregia et præstantior Ars Medica habenda sit—si quæ sit in eâ humanitatis gratia—si quis utilioris vitæ honor, mutuum auxilium, mutuamque fidem adhibere—labores participare—curas consociare—et omni quod nec honestum nec decorum sit, pro virili resistere, præcipuè nostrum est. Cujuscunque enim vel gradus simus, vel ordinis—sive manu, sive consilio valemus—ad idem ferè propositum tendimus—in eodem nos omnes versamur. Absint, igitur, à nobis, O Socii ! rixæ—absint simultates—absit invidia ! Si in re Medicâ renovatio quædam et commutatio sit instituenda, ne bellum civile, quod Europam ferè universam nuperrimè foedavit, templum Apollini sacrum, vos precor, polluat ! Ita vero instituatur, ita ordinetur Reformatio, ut, vice distractahendi, arctiori potius vinculo nos invicem alliget ! Latius hujus templi pandantur portæ, adeo ut quæcunque sit Alua Mater, sive sit Oxonieusis, sive Cantabrigiensis, sive Londinensis, sive vel Edinensis vel Eblanensis, filii cuiusque, (sint modo digni) nos inter recipiantur ! “ Salus enim populi suprema lex ;” Saluti Populi præ omnibus Medici consulunt ; et (ut hanc tandem Orationem, plus æquo prolixam, in verbis Ciceronis, ad finem ducam). “ In nullâ re, homines propriùs “ad Deos accedunt, quàm Salutem hominibus dando !” Valete !

LONDON :

PRINTED BY G. J. PALMER, SAVOY STREET, STRAND.